



江津縣志卷七之一

人物志上

鄉宦

行誼

文學

先烈

列女

鄉宦

漢

然温江州人爲度遼將軍守桂陽長於治民能得其心祀鄉賢祠


謁渙 陳爲 譙章俱江州人渙仕至汝南太守有公直稱爲官司隸校

尉秉正嫉邪立朝有聲章度遼將軍嚴正剛直時號江州三傑均祀鄉賢

祠

蜀漢

董和其先江州人徙南郡枝江漢末率屬西還依劉璋仕成都令時俗侈



甚和躬率以儉遷益州守清廉潔已推誠服彝南方信愛之先主定蜀徵和爲中郎將與諸葛亮并署大司馬事外牧殊域內幹機衡二十餘年卒之日家無儋石亮追思稱歎不置祀鄉賢祠

晉

母雅江州人居邑屬二賢山學貫四科貢於朝除涪陵漢平令爲夜郎太守殊域感其惠化卒年八十有二祀鄉賢祠

宋

馬邈仕驍騎將軍前志列入武功事蹟無考

石公恕以武功大夫知威州有能名常作文刻碑戒子縣勿得父異祀鄉

賢祠

張弦舉進士名對直言無所避忌累仕至湖廣總領有幹局長於籌邊祀鄉賢祠

明

江英字順中歷官貴州浙江雲南左參議有威政卒祀鄉賢祠

吏部尙書王直江公神道碑云江氏之先黃州黃岡人公高祖萬九曾祖文友祖世禪皆有隱德而不仕元季兵亂世禪避地入蜀居江津之石橋里考必達讀書勵行不事表暴夏明玉珍欲用之不就公其仲子也諱英字順中幼聰敏喜學日記數千言爲文必以理勝而尤工於詩朋輩皆推讓之舉於鄉進於禮部授綬寧教諭綬寧襍夷獠不樂學公循循善誘俗爲之變公有治理才慨然欲見於用奏疏言時政得失上

可之召爲寶鷄丞外嚴內恕百務備舉盜賊屏息困圍空虛他邑有不  
平者亦請質焉永樂初應求賢舉知滄州州當南北之衝兵革之後凋  
弊未蘇供結力役不勝其煩公量緩急度輕重應之各適其宜而人不  
告病郡以治聞太宗皇帝初設貴州布政司擇才賢以撫其民命公爲  
左參議時苗未盡化其首有苗普亮者號普天王聚眾叛朝廷命鎮遠  
侯率兵勦之久不克公因上方略上知其謀可用命以民兵偕行公嚴  
偵伺重賞購得其情實率敢死士徑擣入巢穴擒斬普亮並斬僞開天  
侯僞軍師楊質二等傳首京師一境以寧丁外艱服除調浙江羣僚皆  
以軍繫獄公獨理無不治藩省吏有大姦雖元僚莫能制公臨之以法  
或缺一或斂避人皆快之公不以爲異念羣僚以糧入不實逮繫而已

字

乃幸免請從坐上亦察其無他皆宥之人以是服公之義丁母憂過哀寢處於地水漿不入口者七日因得風疾旣愈造朝調雲南未幾疾復作請假乞歸舊例年未七十者皆罷官公時年五十五以貴州平寇力獨得以官歸治病士大夫榮之公自謂荷上厚恩無以報遣子淵受學邑庠學成取進士入翰林爲編修公雖累佐大藩而未受誥及編修顯乃授公雲南布政司左參議誥命進陞朝請大夫迨後編修累陞佐戶部長翰林朝廷復以其官贈公追榮至三品此可以觀德矣公初爲丞時迎親就養凡衣食器物皆躬理之曰吾親所服用也王氏姊蚤寡撫二甥安寧如己子諸兄弟析產業自占十七八公僅獲一二終不校族弟旭孤貧不能娶公爲之娶嘗從蘇伯瑜先生學事之如父始終未嘗

廢禮見人有急排難解紛不惜貲其厚於仁多此類生於洪武辛亥十  
二月二十七日以宣德丙午八月二十一日卒享年五十六娶周氏有  
賢行封淑人子男六曰漢曰浩曰淵今官至太子少師吏部左侍郎兼  
翰林院學士曰淮曰濟曰深郡庠訓導女三嫁白子貴蘇缺一字翟茂字

孫男某某諸子以公卒次年丁未正月二十日葬於里之三河口幟旗  
山之原至是少師以內艱得奉命奔喪念公之墓未有文以昭德垂遠  
乃自述其行來請銘將刻諸神道於戲公之德積於身刑於家施於政  
事而又成其子之賢荷上之寵命光榮盛大如此奚可以不敏不銘乃  
按狀序次其事而系以銘俾刻焉銘曰蜀山崇崇靈秀所鍾篤生偉才  
以相天工始以文進與有民社遂理一州政復優暇擢副方伯皇仁用

施苗頑弗恭亦震以威彼昏卒狂猶敢肆逆公宏厥謨乃底成績浙右  
滇南是曰大藩公往佐之秋肅春溫帝欲用公而以病告功名未終誰  
不嗟悼公德之茂子也克賢三品之榮寵贈自天刻銘墓碑負以龜趾  
燁其休光垂示無已

石溫洪武中領鄉薦擢陝西鳳翔府同知才能著稱尋陞交趾布政司參  
議祀鄉賢祠

黃德洪武間任甯我知縣草創之初一以寬大馭之

鄒瑾字公瑾洪武初以經明行修授江津教諭拜監察御史建文中改大  
理丞靖難兵薄金川門徐增壽李景隆謀內應瑾與御史魏冕毆增壽幾  
死瑾當陞大呼請速誅帝手刃增壽併欲誅景隆不果景隆同谷王穗開

門迎降瑾死之祀忠義祠

李鑑永樂鄉舉教諭蒲圻得士子心歷常德知府遇荒善賑多所全活祀鄉賢祠

劉澶宣德中貢生任南直安慶府推官誠篤而慈惠能明法律凡所推讞務爲詳審不使冤抑獄無畱滯見安慶志名宦傳中

江淵字時用號定菴縣北杜市里人起家侍講入閣預機務當土木之變正統北狩明祚幾危淵與于謙等五人奉太后命立景泰明捷錄云不以金注而以瓦注不迎實以迎之也旣果變輿得旋英宗復辟淵謫戍卒著有觀光錦榮諸集崇祀鄉賢祠

明史傳云江淵字時用江津人宣德五年庶吉士授編修正統十二年

詔與杜寧裴綸劉儼商輅陳文揚鼎呂源劉俊王玉共十人肄業東閣曹鼎等爲之師郕王監國徐有貞倡議南遷太監金英叱出之踉蹌過左掖門淵適入迎問之有貞曰以吾議南遷不合也於是淵入極陳固守之策遂見知於王由侍講起擢刑部右侍郎也先薄京師命淵參都督孫鏗軍事景泰元年出視紫荆倒馬白羊諸關隘與都指揮同知翁信督修雁門關其秋遂以本官兼翰林學士入閣預機務尋改戶部侍郎兼職如故明年六月以天變條上三事一厚結朵顏赤斤諸衛爲東西藩籬一免京軍餘丁以資生業一禁訐告王振餘黨以免枉濫詔悉從之又明年二月改吏部仍兼學士是春京師久雨雪淵上言漢劉向曰凡雨陰也雪又陰之陰也仲春少陽用事而寒氣脅之占法謂人君

刑法暴濫之象陛下恩威溥洽未嘗不赦過宥罪竊恐有司奉行無狀  
冤抑或有未伸且向者下明詔免景泰二年田租之三今復移檄追徵  
則是朝廷自失大信於民怨氣鬱結良由此也帝乃令法司申冤濫詰  
戶部違詔下尙書金濂於獄卒免稅如詔東宮既易加太子少師四川  
巡撫僉都御史李匡不職以淵言罷之母憂起復初侍講學士倪謙遭  
喪淵薦謙爲講官謙遂奪哀至是御史周文言淵引謙正自爲今日地  
帝以事旣處分不問而令自今羣臣遭喪無濫保五年春山東河南江  
北饑命同平江侯陳豫往撫淵前後條上軍民便宜十數事并請築淮  
安月城以護常盈倉廣徐州東城以護廣運倉悉議行時江北洊饑淮  
安糧運在塗者淵悉追還備賑漕卒乘機侵耗事聞遣御史按實淵被

劾當削籍廷臣以淵守便宜不當罪帝宥之閣臣既不相協而陳循王文尤刻私淵好議論每爲同官所抑意忽忽不樂會兵部尙書于謙以病在告詔推一人協理部事淵欲得之循等佯推淵而密令南輅草奏示以石兵江工四字淵在旁不知也比詔下調工部尙書石璞於兵部而以淵代璞淵大失望英宗復位與陳循等俱謫戍遼東未幾卒初黃珙之奏易儲也或疑淵主之邱濬曰此易辨也廣西紙與京師紙異索奏視之果廣西紙其誣乃白成化初復官

清邑令曾受一論云士君子當國家危難之際以一身任社稷之重識見精明志意堅定卒能撐拄國是奠安宗祏曾子所謂可託可寄而不可奪者三代以後若明之于忠肅庶幾近之而考當時能與之同幹

濟共功名者實爲江淵方英宗土木之變人心洶懼徐有貞倡議南遷  
當時于忠肅謂議者可斬淵亦極陳固守之策也先入紫荆關力助忠  
肅拒守退敵卒迎鑾輿以歸英宗復辟有貞竊柄忠肅被刑淵亦謫死  
跡其始終計議行事洵足附忠肅以成偉烈垂不朽讀本傳詳哉其言  
之矣其見於他傳若王文希權璫王振指欲坐薛瑄死罪淵上言法司  
斷獄多枉雖非直論薛事而心實爲薛由此觀之淵不特于忠肅之流  
亞抑亦薛文清之徒也此事本傳所未及予故表而出之至於薦倪謙  
奪情他日毋憂起復御史周文謂昔之薦謙正爲今日則似不能以禮  
處人又不能以禮自處貽人口實亦固其所然其生平樹立忠義根於  
天性勳猷炳於史冊堪與日月爭光豈以一眚掩大德哉

石敏中景泰歲貢任湖廣松滋縣知縣清慎廉介居官如治家運軍餉築城垣民不知困祀鄉賢祠

江孟綸字廷緒成化進士拜浙江道監察御史諤諤敢言以直節著巡按陝西平滿四之亂上賜綵帛陞三品俸巡按山東大賑飢民嘗糾銓曹選法爲典選所忌出遷湖廣按察司僉事尋轉浙江擢河南副使奉勅提督河南學政所在有聲卒於官著有梅菴集祀鄉賢祠

楊銓成化甲午舉人任雲南易門縣聽訟明決興學校弭盜賊清廉白矢士民戴之祀鄉賢祠

楊彝字几川正德庚辰進士幼有大志博究經史初令宿松慈祥愷悌民慕如父母三載行取宿松士民遮畱不得建祠肖像祀之任雲南道監察

御史在臺端多直言奉勅清戎浙江尋命巡按貴州時重守令之選擇知  
吉安府事巡按交薦授河南按察副使未幾致仕歸以書史自娛四方搢  
紳書幣問遺無虛日年六十有五卒邑人戶部郎中周世遠誌墓稱其天  
姿純厚才識敏達歷官中外建立不虛居鄉尤以道自重云

李臨陽嘉靖甲辰進士歷官岳州府廉平惠愛歲饑多方賑濟全活以數  
萬計擢陝西按察司副使去之日士民遮道送之爲著貞惠錄祀鄉賢祠  
周世遠嘉靖甲辰進士歷官山西右布政居官廉明仁惠清慎潔己屢經  
薦列民感其德建生祠祀之祀鄉賢祠


徐效賢嘉靖舉人爲澄城縣令清廉恤民澄城人繪像祀之祀鄉賢祠

程典字五江嘉靖戊午舉人任湖廣遠安令止一僕自隨奏最當內召適

江陵張相憂歸檄與爲治喪事不應拂張意外補沔陽知州考滿入都以當路索賄致仕歸沔人懷之爲之歌曰一主一僕不貪不酷飯有粥菜無肉可謂清白吏矣

程大猷字允軒以明經選道州倅轉山東泰安州同知有以陋規累千金進者卻不受陞濱州守興利除弊州人德之爲立祠明季喪亂孫源過其地有大俠某知爲守孫脫之於難其遺愛可想也

**楊** 人歷任蘇州府同知居官清正忤織造監被謫事載明紀祀鄉賢



曹邦化以明經授吉安府通判嚴正不阿郡人劉給事忤時相時相銜之欲誣以事邦化力爲之辨獲免遷寧州知州子進可登科報至遂辭不就

任致仕歸里操行純備祀鄉賢祠

曹進可縣南筍溪里隆慶舉人歷任蘇州府通判黃平州知州山東萊州府同知乞休歸適奢酋以援遼兵叛據渝城進逼成都巡撫朱燮元調官兵進剿進可以鄉紳贊畫賊平燮元過訪卽起復爲貴州平越府陞按察司從黔撫王三善監軍進剿大方屢言苗性叵測不宜懸兵深入王不聽以及於敗進可馬上中矢石幾死與所部數百人突圍出未幾致政歸優游二十餘年慕義好施鄉人德之壽八十四卒葬梁灘戶部侍郎倪斯蕙銘其墓曰擊楫祖逃免胃汾陽制勝諸葛籌邊贊皇其誥贈中憲大夫神道碑乃總督朱燮元題也祀鄉賢祠

卞孔時字汝行任武昌同知勦播酋有功以剛直忤璫繫獄十三年僅得